

四庫全書

集部

欽定四庫全書

集部

粵西文獻卷六十二

詳校官庶吉士<sub>臣</sub>瑚圖禮

主事銜<sub>臣</sub>徐以坤覆勘

總校官庶吉士<sub>臣</sub>朱鈐

校對官中書<sub>臣</sub>牛稔文

謄錄進士<sub>臣</sub>沙重輪

欽定四庫全書

粵西文載卷六十二

桂林府通判汪森編

傳

名宦

秦史祿以史監郡始皇帝伐百粵使尉屠睢發卒五十萬為五軍一軍塞鐔城之嶺一軍守九疑之塞一軍處番禺之都一軍守南野之界一軍結餘干之水史祿轉

餉鑿渠而通糧道自海陽山導水源以湘水北流入于楚澍江為牂牁下流南入于海遠不相謀轉餉為勞量為磯以激水於沙磧中壘石作鐮派湘之流而注之澍激行六十里置陡門三十六舟入一陡則復闌一陡使水積漸進故能循崖而上建瓴而下既通舟楫又利於灌田號為靈渠

漢路博德西河平州人元鼎五年秋拜伏波將軍討南粵六年冬南粵平遂以其地為儋耳珠崖南海蒼梧鬱

林合浦交趾九真日南九郡

羅弘長沙人元封五年初置交趾部刺史察所部郡國  
治所在蒼梧郡往刺史多以荒遠行部罕遍部吏因得  
恣其貪殘弘為刺史春行冬息徧歷所部咨詢疾苦太  
守多解綬請罪弘廉實舉發一時貪殘為之斂迹

劉外南陽人元康初任鬱林守約已愛人卓有政績  
何敞九江人元始中為刺史蒼梧廣信縣寡婦蘇娥以  
窮羸不能自振將所有雜繒百二十匹欲往旁縣賣之

已賃牛車載繒其上與婢俱往暮止鵠奔亭是夜為亭  
長龔壽所殺及其婢踰年未發敞行部宿亭中夜未半  
娥出告敞乃遣吏捕壽拷問具服下廣信縣驗問與娥  
語同收壽父母兄弟皆繫獄請並斬以助陰誅報曰可  
東漢費貽健為南安人公孫述據蜀時徵之漆身為癩  
佯狂以避述亡光武徵為合浦太守

馬援字文淵茂陵人建武十七年交趾女子徵側徵貳  
反寇略嶺外六十餘城側自立為王於是拜援伏波將

軍擊交趾至合浦緣海而進隨山刊道千餘里至浪泊  
上與賊戰破之追至禁谿明年正月斬徵側徵貳傳首  
洛陽封援為新息侯食邑三千戶援遂擊九真賊徵側  
餘黨都羊等嶠南悉平援所過輒為郡縣治城郭穿渠  
灌溉以利其民條奏越律與漢律駁者十餘事與越人  
申明舊制以約束之自後駱越奉行馬將軍故事乃鑄  
銅柱立界上二十年秋振旅還京師  
喻猛和帝時蒼梧太守以清白為治郡人頌之

綦母俊上虞人安帝時為刺史元初三年合浦蠻反遣御史任連督州郡兵討之俊以蒼梧當合浦下蠻或流劫猝難回顧乃先保障蒼梧後往合浦所向摧靡功當封賞上書歸功于連自謂致寇當誅詔下美之論者稱俊能讓

陳稚升蒼梧太守治尚清靜民化之囹圄恒空臨水釣魚以自適

陳臨字子然南海人永建中蒼梧太守推誠而理有殺



人者為吏所獲臨知其無嗣令其妻侍獄中後產一男  
郡人歌之

張喬永和二年日南象林徼外蠻尸區憐數千人攻象  
林縣燒城寺殺長吏交趾刺史樊演發交趾九真二郡  
兵救之兵士憚遠役遂反攻其郡會侍御史賈昌使在  
日南與州郡討之不利遂為所攻圍帝以為憂明年召  
公卿百官問其方略皆議遣大將發荆揚兗豫四萬人  
赴之李固駁其不可謂喬可用帝即拜為交趾刺史喬

至開示慰誘之並皆降散嶺外復平

夏方九江人建康元年日南蠻千餘人攻縣邑方為交趾刺史開恩招誘賊皆降服遷為桂陽太守延熹三年居風朱達為亂渠帥屯據日南復拜方為交趾刺史方威惠素著賊二萬餘人相率降

陳茂字君恩汝南人容止儼恪鬚眉甚偉仕交趾別駕舊令刺史行部不涉漲海漢永和中盜賊起日南九真海濱皆震刺史周敞涉海遇風船欲覆茂拔劍訶水神

風即息人望之以為神明莫不仰望後為荊州刺史  
周敞汝南人順帝時交趾刺史懷柔民戢甚有威惠  
度尚字博平山陽湖陸人延熹五年長沙零陵賊七八  
千人自稱將軍入桂陽蒼梧南海交趾交趾刺史及蒼  
梧太守望風逃奔二郡皆沒遣御史中丞盛修募兵討  
之不能克豫章艾縣六百餘人應募不得賞直怨恚遂  
反焚燒長沙郡縣寇益陽殺縣令又遣謁者馬睦持節  
督荊州刺史劉度擊之軍敗睦度奔走桓帝詔公卿舉

任代劉度者尚書朱穆舉尚尚躬率部曲與同勞逸廣募雜種諸蠻夷明設購賞進擊大破之降者數萬人桂陽宿賊渠帥卜陽潘鴻等畏尚威烈徙入山谷窮追數百里遂入南海自以深固不復設備大破平之尚出兵三年羣寇悉定七年封右鄉侯遷桂陽太守

張磐字子石丹陽人交州刺史延熹五年長沙零陵賊起攻入桂陽南走蒼梧時荊州刺史度尚廣募蠻夷明設購賞破其渠帥降者數萬人其餘黨入梧者磐自將

擊之斬捕幾盡尚徵還京餘黨復熾尚恐磐上狀先誣  
奏磐乃徵下廷尉辭狀未具會赦磐不肯出獄吏謂磐  
曰天恩曠然而君不出何也磐因自列曰前長沙賊胡  
蘭作難荊州餘黨散入交趾磐身膺甲冑涉危履險討  
擊凶患馘斬渠帥餘賊烏竄荊州刺史度尚懼磐先言  
畏罪誣奏磐備位方伯為國爪牙而為尚所枉受罪牢  
獄夫事有虛實法有是非磐實不辜赦無所除如忍以  
苟免永受侵辱之恥生為惡吏死為敝鬼乞傳尚詣廷

尉面對曲直足明真偽倘尚不徵磐埋骨牢檻終不虛  
出廷尉以其狀上詔書徵尚到廷尉辭窮受罪以先有  
功得原磐在官以清白稱

孟嘗字伯周上虞人桓帝時合浦太守郡不產穀實而  
海出珠與交趾比境常通商販先時宰守多貪穢詭人  
採求珠漸徙交趾於是行旅不至貧者死餓于道嘗革  
易前弊去珠復還商賈流通以病去官吏民攀車請之  
乃載鄉民船夜遁去

谷永建寧中鬱林太守廣鬱古西甌駱越所居永以恩  
信招降烏潯人十餘萬內屬開置七縣郡人立祠祀之  
賈琮字孟堅東郡聊城人舉孝廉再遷為京兆令有政  
理迹舊交趾土多珍產明珠翠羽犀象瑇瑁異香美木  
之屬莫不自出前後刺史率多無清行上承權貴下積  
私賂財計盈給輒復求見遷代故吏民怨叛中平元年  
交趾屯兵反執刺史及合浦太守自稱柱天將軍靈帝  
特勅三府精選能吏有司舉琮為交趾刺史琮到部訊

其反狀咸言賦斂過重百姓莫不空單京師遙遠告冤  
無所民不聊生故聚為盜賊琮即移書告示各使安其  
資業招撫荒散蠲復徭役誅斬渠帥為大害者簡選良  
吏試守諸縣歲間蕩定百姓以安巷路為之歌曰賈父  
來晚使我先反今見清平吏不敢飯在事三年為十三  
州最徵拜議郎

楊璇字璣平烏傷人父扶交趾刺史有能聲靈帝時璇  
為零陵太守是時蒼梧桂陽猾賊相聚攻郡縣賊衆多



而璇力弱吏人憂恐璇乃特制馬車數十乘以排囊盛石灰於車上繫布索於馬尾又為兵車專設弓弩尅期會戰乃令馬車居前順風鼓灰賊不得視因以火燒布布燃馬驚奔突賊陣因使後車弓弩亂發鉦鼓鳴震羣寇披駭破散追逐傷斬無數梟其渠帥郡境以清

朱儁字公偉上虞人交趾賊梁龍等萬餘人與南海太守孔芝反攻破郡縣光和元年拜儁交趾刺史宣揚威德以震動其心既而與七郡兵俱進斬梁龍降者萬餘

人旬月盡定

唐頌字德雅番禺人以孝仕為布山令布山在鬱林境中雜以民戶號稱難治頌輔以太和不事威讐挫彊拊柔惠及惇發民感其仁無梗化者後頌卒民報祀之

周乘建安中交州刺史上書云交州絕域習于貪濁強宗聚奸長吏肆狡侵漁萬民今為聖朝掃清一方時屬城解綬者三十餘人

吳步騭字子山淮陰人建安十五年交州刺史劉表所

置蒼梧太守吳巨陰懷異心外附內違隲降意懷誘請  
與相見因斬殉之威聲大振士變兄弟列在諸郡相率  
供命南土之賓自此始

黃蓋南海人仕吳為始安太守時郡治初建蓋多所規  
拓加以嚴飭下不容姦於時吏治最稱能理

薛綜竹邑人黃龍三年合浦太守上疏言鬱林等郡未  
綏新刺史宜得方略智計假以威寵責其成效從之

呂岱字定公海陵人延康元年代步騭為交州刺史到

州高涼賊帥錢博乞降岱因承制以博為高涼西郡都尉鬱林夸賊攻圍郡縣岱討破之是時桂陽潯陽賊王金合衆于南海界上首亂為害權又詔岱討之生縛金傳送詣都斬首獲生凡萬餘人遷安南將軍假節封都鄉侯交趾太守士燮卒權以燮子徽為安遠將軍領九真太守以校尉陳時代燮代表分海南三郡為交州以將軍戴良為刺史海東四郡為廣州岱自為刺史遣良與時南入而徽不承命舉兵戍海口以拒良等岱于是

上疏請討徽罪督兵三千人晨夜浮海或謂岱曰徽藉累世之恩為一州所附未易輕也岱曰今徽雖懷逆計未虞吾之卒至若我潛軍輕舉掩其無備破之必也稽留不速使得生心嬰城固守七郡百蠻雲合響應雖有智者誰能圖之遂行過合浦與良俱進徽聞岱至果大震怖不知所出即率兄弟六人肉袒迎岱岱皆斬送其首徽大將甘醴桓治等率吏民攻岱奮擊大破之進封番禺侯於是除廣州復為交州如故岱既定交州復

進討九真斬獲以萬數又遣從事南宣國化暨徼外扶南林邑堂明諸王各遣使奉貢權嘉其功進拜鎮南將軍黃龍三年以南土清定召岱還屯長沙漚口會武陵蠻夸蠡動岱與太常潘濬共討定之濬卒代濬領荊州在武昌頃之廖式作亂攻圍城邑零陵蒼梧鬱林諸郡搔擾岱自表輒行星夜兼路權遣使追拜岱交州牧及遣諸將唐咨等絡繹相繼攻討一年破之斬式及遣諸所偽署臨賀太守費楊等并其支黨岱清身奉公所在

可述初在交州歷年不餉家妻子饑乏權聞之歎息以讓羣臣曰呂岱出身萬里為國勤事家門內困而孤不早知股肱耳目其責安在於是加賜錢米布絹歲有常限

陸胤字敬宗凱弟也赤烏十一年交趾九真夷賊攻沒城邑交部搔動以胤為交州刺史安南校尉胤入南界喻以恩信務崇招納高涼渠帥黃吳等支黨三千餘家皆出降引軍而南重宣至誠遺以財幣賊帥百餘人民

五萬餘家莫不稽顙交域清泰就加安南將軍復討蒼梧建陵賊破之前後出兵八千餘人以充軍用永安元年徵為西陵督封都亭侯後轉左虎林中書丞華覈表薦脩曰脩天恣聰朗才通行絜昔歷選曹遺迹可紀還在交州奉宣朝恩流民歸附海隅肅清蒼梧南海歲有舊風障氣之害風則折木飛砂轉石氣則霧鬱飛鳥不經自脩至州風氣絕息商旅平行民無疾疫田稼豐稔州治臨海海流秋鹹脩又畜水民得甘食惠風橫被化



感神人遂憑天威招合遺散至被詔書當出民感其恩以忘戀土負老攜幼甘心景從衆無攜貳不煩兵衛自諸將合衆皆脇之以威未有如肩結以恩信者也銜命在州十有餘年賓帶殊俗寶玩所生而內無粉黛附珠之妾家無文甲犀象之珍方之今臣實難多得宜在輦轂股肱王室以贊唐虞康哉之頌江邊任輕不盡其才虎林選督堪之者衆若召還都寵以上司則天工畢修庶績咸熙矣肩卒子式嗣為柴桑督楊武將軍

陸績字公紀吳郡人為鬱林太守遠俗不知學績迪以詩書士慕其風樂其教皆舍里居而從其學滿歸舟輕取石壓之人稱其廉號鬱林石

晉陶璜字世英秣陵人父基吳交州刺史璜仕吳歷顯位孫皓時交趾太守孫譔貪暴為百姓所患會察戰鄧荀至擅調孔雀三千頭遣送秣陵既苦遠役咸思為亂郡吏呂興殺譔及荀以郡內附武帝拜興安南將軍交趾太守尋為其功曹李統所殺帝更以建寧爨谷為交

趾太守谷又死更遣巴西馬融代之融病卒南中監軍  
霍弋又遣犍為楊稷代融與將軍毛炅九真太守董元  
牙門孟幹孟通李松王業爨能等自蜀出交趾破吳軍  
于古城斬大都督修則交州刺史劉俊吳遣虞汜為監  
軍薛珣為威南將軍大都督璜為蒼梧太守距稷戰于  
分水璜敗退保合浦亡其二將珣怒謂璜曰若自表討  
賊而喪二帥其責安在璜曰下官不得行意諸軍不相  
順故致敗耳珣怒欲引軍還璜夜以數百兵襲董元獲

其寶物船載而歸珣乃謝之以璜領交州為前部督璜從海道出於不意徑至交趾元距之諸將將戰璜疑斷牆內有伏兵列長戟於其後兵纔接元偽退璜追之伏兵果出長戟逆之大破元等以前所得寶船上錦物數千匹遺扶嚴賊帥梁奇奇將萬餘人助璜元有勇將解系同在城內璜誘其弟象使為書與系又使象乘璜輜車鼓吹導從而行元等曰象尚若此系必有去志乃就殺之珣璜遂陷交趾吳因用璜為交州刺史璜有謀策

周窮好施能得人心滕修數討南賊不能制璜曰南岸仰吾鹽鐵斷勿與市皆壞為田器如此二年可一戰而滅也修從之果破賊初霍弋之遣稷晃等與之誓曰若賊圍城未百日而降者家屬誅若過百日救兵不至吾受其罪稷等守未百日糧盡乞降璜不許給其糧使守諸將並諫璜曰霍弋已死不能救稷等必矣可須其日滿然後受降使彼得無罪我受有義內訓百姓外懷鄰國不亦可乎稷等期訖糧盡救兵不至乃納之修則既

為毛昺所殺則子允隨璜南征城既降允求復讎璜不許昺密謀襲璜事覺收昺呵曰晉賊昺厲聲曰吳狗何等為賊允剖其腹曰復能作賊不昺猶罵曰吾志殺汝孫皓汝父何死狗也璜既擒稷等並送之稷至合浦發病死孟幹爨能李松等至建鄴皓將殺之或勸皓幹等忠于所事宜宥之以勸邊將皓從其言將徙之臨海幹等志欲北歸慮東徙轉遠以吳人愛蜀側竹弩言能作之皓留付作部後幹逃至京都松能為皓所殺幹陳伐

吳之計帝乃厚加賞賜以為日南太守先是以楊稷為交州刺史毛炁為交趾太守印綬未至而敗即贈稷交州炁及松能子並關內侯九真郡功曹李祚保郡內附璜遣將攻之不尅祚舅黎晃隨軍勸祚令降祚答曰舅自吳將祚自晉臣唯力是視耳踰時乃拔皓以璜為使持節都督交州諸軍事前將軍交州牧武平九德新昌土地阻險夸獠勁悍歷世不賓璜征討開置三郡及九真屬國三十餘縣徵璜為武昌都督以合浦大中修允

代之交土人請留璜以千數於是遣還皓既降晉手書遣璜息融赦璜歸順璜流涕數日遣使送印綬詣洛陽帝詔復其本職封宛陵侯改為冠軍將軍吳既平晉滅州郡兵璜上言曰交土荒裔斗絕一方或重譯而言連帶山海又南郡去州海行千有餘里外距林邑纔七百里夸帥范熊世為逋寇自稱為王數攻百姓且連接扶南種類猥多朋黨相倚負險不賓往隸吳時數作寇逆攻破郡縣殺官吏臣以疋驚昔為故國所採偏戍在南



十有餘年雖前後征討翦其魁桀深山僻穴尚有逋竄  
又臣所統之卒本七千餘人南土溫濕多有氣毒如累  
年征討死亡減耗其見在者二千四百二十人今四海  
混同無思不服當卷甲消刃禮樂是務而此州之人識  
義者寡厭其安樂好為禍亂又廣州南岸周旋六千餘  
里不賓屬者乃五萬餘戶及桂林不羈之輩復當萬戶  
至於服從官役纔五千餘家二州唇齒唯兵是鎮又寧  
州興古接據上流去交趾郡千六百里水陸並通互相

維衛州兵未宜約損以示單虛夫風塵之變出於非常  
臣亡國之餘議不足採聖恩廣厚猥垂飾擢蠲其罪釁  
改授方任去辱即寵拭目更視誓念投命以報所受臨  
履所見謹冒瞽陳又以合浦郡土地磽确無有田農百  
姓唯以采珠為業商賈去來以珠貨米而吳時珠禁甚  
嚴慮百姓私散好珠禁絕來去人以飢困又所調猥多  
限每不充今請上珠三分輸二次者輸一麤者蠲除自  
十月訖二月非採上珠之時聽商旅往來如舊並從之

在南三十年威恩著於殊俗及卒舉州號哭如喪慈親  
朝廷乃以員外散騎常侍吾彥代璜彥卒又以員外散  
騎常侍顧秘代彥秘卒州人逼秘子參領州事參尋卒  
參弟壽求領州州人不聽固求之遂領州壽乃殺長史  
胡肇等又將殺帳下督梁碩碩走得免起兵討壽禽之  
付壽母令鴆殺之碩乃迎璜子蒼梧太守威領刺史在  
職甚得百姓心三年卒威弟淑子綏後並為交州自基  
至綏四世為交州者五人

吾彥字士則吳人仕吳遷員外散騎常侍會交州刺史  
陶璜卒以彥為南中都督交州刺史初璜死九真戍兵  
作亂逐其太守九真賊帥趙祉圍郡城彥悉討平之在  
鎮二十餘年威恩宣著南州寧靖

毛晃仕晉泰始七年守鬱林郡壯勇慷慨為吳將陶璜  
所執晃不屈而死後人立祠祀之

陶侃字士行潯陽人忤王敦左遷廣州刺史時王敦以  
王機為交州刺史杜弘據臨賀與溫邵及交州秀才劉

沉謀反侃擊杜弘破之執劉沉於小桂又遣部將許高討機斬之大興初進平南將軍尋加都督交州軍事時交州刺史王諒為賊梁碩所陷侃遣將高寶進擊平之以侃領交州刺史錄前後功加都督交廣寧七州軍事干寶字令升新蔡人為始安太守治尚清靜公退即務著述

南宋顏延之瑯琊人少孤貧好讀書無所不覽少帝即位累遷始安太守領軍將軍謝晦謂延之曰昔荀勗忌

阮咸斥為始平郡今卿又為始安可謂二始延之之郡  
道汨潭為湘州刺史張邵祭屈原文以致其意在始安  
建讀書臺於獨秀山刻五君詠於其中

杜慧度交趾朱載人義熙六年除交州刺史其年春盧  
循襲破合浦徑向交州慧度拒於石崎破之六月循晨  
造南津令三軍入城乃食慧度自登高艦放火箭燒循  
船循中箭赴水死遂斬循及父嘏并循二子並傳首京  
師以功封龍編侯慧度布衣疏食儉約質素禁斷淫祀

崇修學校歲荒民饑則以私祿賑給為政纖密有如治家威惠沾洽奸盜不起乃至城門不閉道不拾遺

劉勔字伯猷彭城上里人文帝時除寧遠軍綏建太守元嘉末蕭簡據廣州為亂勔起義兵討之刺史宗慤命為軍府主簿以功封大亭侯除員外散騎侍郎大明初遣費沈伐陳壇不克乃除勔龍驤將軍西江督護鬱林太守勔隨宜剪定大致名馬并得珊瑚連理樹以獻太宗即位遷輔臣將軍尋擢廣州刺史元徽中桂林王休

範作亂勔與戰死之勔著聲南土廣人思之贈司空謚  
曰忠昭

齊裴昭明聞喜人永明三年始安內史郡人龔元宣云  
神人與其玉印玉版書不須筆吹紙便成字自稱龔聖  
人以此惑衆前後郡太守敬事之昭明付獄案罪

梁蕭勃天監中定州刺史省刑薄稅勸課農桑民賴以  
安討李貴於交州克之威名大振

裴邃字深明河東人仕魏為魏郡太守遷廣陵與鄉人



共入魏武廟因論帝王功業其妻甥王篆之密啟梁武帝云裴邃多大言有不臣迹由是左遷始安致書呂僧珍曰昔阮咸顏延之有二始之歎吾才不逮古人今為三始非其願也後為竟陵太守

陳淳于量字思明其先濟北人世居建業仕梁元帝以軍功封廣晉縣男出為都督桂林刺史王琳擁制湘郢累遣召量量外與琳往來而別遣使歸陳武帝武帝受禪徵為中撫軍大將軍量所部將帥多戀本土文帝使

湘州刺史華皎征衡州且以兵迎量天康元年至都吳明徹之北侵也量贊成其事又遣第六子率所部從軍淮南克定改封始安郡公

隋權武字武持天水人少果勁勇力絕人能重甲上馬嘗倒投于井未及泉復躍而出其拳捷如此後進大將軍檢校潭州總管桂州人李世賢作亂武以行軍總管與虞慶則擊平之

陳頴字遵道代州武川人仁壽中朝廷以嶺南刺史縣

令多貪鄙蠻戾怨叛妙簡清吏於是拜頴大將軍桂州總管十七州軍事及至官大崇恩信民戾悅服

劉方長安人仁壽中交州李佛子作亂據越王故城詔方為交州道行軍總管至都隆嶺遇賊破之進兵臨佛子諭以禍福佛子乃降送於京師

周法尚字道邁安城人桂州李光仕反上令法尚以桂州總管充嶺南安撫大使討之追斬光仕平之

裴肅字神封解人煬帝授肅永平郡丞在官甚得戾人

心歲餘卒。尸獠思之為立廟於鄆江之浦。

令狐熙字長熙，敦煌人。開皇中，以嶺南數亂，徵拜桂州總管七十州諸軍事。大弘，恩信其谿峒，渠帥相謂曰：「前總管皆以兵威相脇，今乃以手教相諭，我輩其可違乎？」於是相率歸附。先是，州縣生梗，長吏多不得之官，寄政於總管。府熙悉遣之，為建城邑，設學校，人尸感化焉。

唐李襲志字重光，金州安康人。初仕隋，歷始安郡丞。大業末，江外盜賊尤甚，襲志散家產招募得三千人，以守

郡城時蕭銑林士弘曹武徹等爭來攻擊襲志固守久之  
之後聞宇文化及弑逆乃集士庶舉哀三日有郡人勸  
襲志曰公累葉冠族久臨鄙郡蠻夸畏威士女悅服雖  
曰隋臣實我之君長今江都篡逆四海鼎沸王號者非  
止一人公宜因此時據有嶺表則百越之人皆拱手向  
化追蹤尉佗亦千載一遇也襲志厲聲曰吾世樹忠貞  
見危授命今雖江都陷沒而宗社猶存當與諸君戮力  
中原共雪讎恥豈可怙亂稱兵以圖不義吾寧蹈忠而

死不為逆節而求生尉佗愚鄙無識何足景慕於是欲  
斬勸者從衆議而止襲志固守經二年而無援卒為蕭  
鈇所陷鈇署為工部尚書檢校桂州總管武德初高祖  
遣其子玄嗣齎書召之襲志乃密說嶺南首領隨永平  
郡守李光度與之歸國高祖又令間使齎書諭襲志曰  
卿昔久在桂州仍屬隋室運終四方圯絕率衆保境未  
知所統朕撫臨天下志在綏育眷彼幽遐思沾聲教况  
卿朕之宗姓情異于常家弟姪並立誠效公又分遣首

領申諭諸州情深奉國甚副所望卿之子弟並據州縣  
俱展誠績每所嘉歎不能已已今並入屬籍著於宗正  
及蕭銑平江南道大使趙郡王孝恭擬襲志桂州總管  
武德五年入朝授柱國封始安郡公拜江州都督及輔  
公祐反又以襲志為水軍總管討平之轉桂州都督襲  
志前後凡任桂州二十八載政尚清簡嶺外安之後表  
請入朝拜右光祿大夫行汾州刺史致仕卒於家

馮盎字明達高州良德人祖馮弘遣子業浮海歸晉留

番禺至盜三世矣擒番禺渠賊高法澄洗寶徹等遂有  
蒼梧朱崖地自號總管或說盜王越盜拒之武德五年  
以地降高祖析為高羅春白崖儋林振八州授盜上柱  
國封越國公俄而羅竇諸洞獠叛盜率衆二萬為諸軍  
先鋒賊據險不可攻盜發七矢斃七人賊退走盜縱兵  
乘之斬首千餘盜善為治閱簿最摘奸伏得民懽心卒  
贈左驍衛大將軍荊州都督

李靖字藥師三原人武德初以平蕭銑功封永康縣公



檢校荊州刺史乃度嶺至桂州分道招慰首領馮盎等  
皆以子弟來謁南方悉定裁量款效承制補官得郡凡  
九十六戶六十餘萬詔書勞勉授嶺南撫慰大使檢校  
桂州總管以嶺南陋遠久不見德非震威武示禮義則  
無以變風即率兵南巡所過問疾苦延見長老宣布天  
子恩意遠近懽服

張士貴貞觀初襲州道總管時峒獠寇亂士貴督征兵  
冒矢石所至悉平諸寇降服南土以平

張大安繁水人上元中為太子庶子章懷太子令與洗馬劉納言等注范曄後漢書光宅中卒於橫州司馬

張九齡字子壽曲江人擢進士為左拾遺坐宇文融謗改太常少卿出冀州刺史九齡以母老在鄉而河北道里遼遠上疏固請換江南一州望得數承母音耗優制許之改為洪州都督俄轉桂州都督仍充嶺南道按察使上又以其弟九臯為嶺南道刺史令歲時伏臘皆得寧覲尋召為秘書少監集賢院學士至中書令

蕭倣拜嶺南節度使南方珍貺叢夥不以入門家人病取槁梅於厨以和劑倣知趣市還之

李嶠字巨山贊皇人擢進士累官監察御史高宗擊邕巖二州叛獠監其軍嶠入洞諭降之由是罷兵

李尚隱景龍中官河南尹十三年夏妖賊劉定高夜犯通洛門尚隱坐不能覺察所部左遷桂州都督臨行帝使謂之曰知卿公忠然國法須爾因賜雜綵百匹以慰之俄又遷廣州都督仍充五府經畧使及去任有懷金

以贈尚隱者尚隱固辭之曰吾自性分不可改易非為  
慎四知也竟不受之

裴懷古壽春人初始安賊歐陽倩衆數萬剽沒州縣以  
懷古為桂州都督招慰討擊使未踰嶺逆以書諭禍福  
賊迎降自陳為吏侵而反懷古乃輕騎赴之或曰蠻戾  
難親備之且不信況易之哉答曰忠信可通神明況裔  
人耶身至壁撫諭倩等大喜悉歸所掠出降雖諸峒素  
讎覆者亦牽連相附嶺外平

王暕景城人景龍末桂州都督州有屯兵舊常仰餉衡  
永暕始築羅郭罷戍卒埭江開屯田數千頃以息轉漕  
百姓賴之後求歸上冢州人詣闕留有詔桂往罹寇暴  
戶口彫瘵宜即留以須政成踰朞年人丐刻石頌德

呂仁景雲中邕州司馬鬱水自蠻境流出民常苦之仁  
引渠分流以殺水勢自是無沒溺之害民乃夾水而居  
元結字次山瀼州人乾元二年容管經畧使身諭蠻豪  
綏定八州會母喪人皆詣節度府請留民樂其教立石

頌德

敬超先為昭州刺史有異政善拾遺杜甫甫寄高適有  
云今海內忘形故人獨漢中王瑀昭州敬使君超先在  
耳祀名宦祠

王翊字宏肱晉陽人大歷五年遷容州刺史容管經畧  
使自安史之亂頻詔徵發嶺南兵募隸南陽魯炅軍炅  
與賊戰於葉縣大敗餘衆離散嶺南谿洞夸獠乘此相  
恐為亂其首領梁崇牽自號平南十道大都統及其黨

覃問等誘西原賊張侯夏永攻陷城邑據容州前後經  
畧使陳仁琇李抗侯令儀耿慎惑元結長孫全緒等雖  
容州刺史皆寄理藤州或寄梧州及翔至藤州言於衆  
曰吾為容州刺史安得寄理他邑乃出私財募將健許  
奏以好爵以是人各盡力不數月斬賊魁歐陽珪馳於  
廣州見節度使李勉求兵為援勉曰容州陷賊已久羣  
獠方強卒難圖也若務速攻祇自敗耳郡不可復也翔  
請曰大夫如未暇出師但請移牒諸州揚言出千兵援

助冀藉聲勢成萬一之功勉然之翊乃以手札告諭義州刺史陳仁瑋藤州刺史李曉庭等盟約討賊翊復募三千餘人同力戰日數合節度使牒止翊用兵翊慮惑將士匿其牒奮起士卒大破賊數萬衆擒其帥梁崇牽賊遁數百里外盡復容州故境翊發使以聞奏置順州以遏餘寇前後大小百餘戰生擒賊帥上獻者七十餘人累加銀青光祿大夫兼御史中丞充招討處置使翊又令其將張利用李寔等分兵討襲西原遂收復鬱林



諸州部內漸安後因哥舒晃殺節度使呂崇賁嶺南復  
亂翺遣大將李寔悉所管兵赴援廣州西原賊率覃問  
復招合夸獠曰容州兵馬盡赴廣州郡可圖也於是悉  
衆來襲翺知其來伏兵禦之生擒覃問其衆大敗代宗  
聞而壯之遣中使慰勞加金紫光祿大夫

杜佑大厯六年容管經畧使綏懷兵民得控制之道盜  
賊一無所犯

李昌巖大厯中桂管觀察使立學宮于獨秀山下平西

原賊潘長安嘗月夜聞鄰居吟咏之音清暢分明訪之  
乃戎昱即延為幕賓因飲席調其侍兒巵知其意即贈  
之昱感賦詩有恩合死前酬之句

李勉字玄卿鄭王元懿曾孫也大厯四年除廣州刺史  
兼嶺南節度觀察使番禺賊帥馮崇道桂州叛將朱濟  
時等阻洞為亂前後累歲陷沒十餘州勉至遣將李觀  
與容州刺史王玢併力招討悉斬之五嶺平

林著莆田人貞元中橫州刺史有政聲

裴行立貞元中桂管觀察使盜遁姦革惠教敷施

戴叔倫字幼公金壇人貞元元年容管經畧使綏徠  
落威名流聞德宗嘗賦中和節詩遣使寵賜代還卒于道

李翱字習之趙郡人涼武昭王之後貞元十四年登進士第太和初累官諫議大夫知制誥拜中書舍人初諫議大夫栢耆將使滄州軍前宣諭翱嘗贊成此行栢耆尋以擅入滄州得罪翱坐謬舉左授少府少監俄出為

鄭州刺史五年出為桂州刺史御史中丞充桂管都防禦使又為邕州刺史大首領黃氏帥其屬納質供賦黃氏儂氏皆羣盜也韋氏不附率羣黃之兵以攻之而逐諸海羣盜皆伏於是十三部二十九州之蠻悉平

武充字虛受貞元中賀州刺史教民以慈愛易俗以禮讓達其志意通其嗜欲曾未幾歲大用治理居任凡六霜困于足痺卒官

韋丹字文明萬年人貞元中容州刺史教民耕織止惰

游興學校民貧自鬻者贖歸之禁民不得掠為隸州未  
有城丹始城之周十三里屯田二十四所教種茶麥仁  
化大行

楊於陵字達夫累官戶部侍郎元和初牛僧儒等以賢  
良方正對策於陵被詔程其文居第一宰相惡其言出  
為嶺南節度使辟韋詞李翱等在幕府咨訪得失教民  
陶瓦易蒲屋以絕火患監軍許遂振者悍戾貪肆憚於  
陵不敢撓以私則為飛語聞京師憲宗不能無惑有詔

罷歸遂振領留事筭吏剔抉其贓吏呼曰楊公尚拒他  
方賂遺肯私官錢耶宰相裴垕亦為帝別白言之乃授  
吏部侍郎而遂振終得罪

馬總字會元扶風人元和四年充嶺南都護本管經畧  
使總敦儒學長於政術在南海累年清廉不撓凡獠便  
之於漢所立銅柱之處以銅一千五百斤特鑄二柱刻  
書唐德以繼伏波之迹以綏蠻功就加金紫八年轉桂  
州刺史桂管經畧觀察使入為刑部侍郎

李佃文皇帝之元孫累官知泉州會烏許厓刺殺郡吏  
毆縛農民詔以公都督邕州兼御史中丞賜紫金魚袋  
為經畧招討使既至則弣弓橐甲去斥堠禁部內無敢  
以賊名使得自澣濯諸酋長咸頓首送款輸稅奉貢願  
比內郡

鄧某南陽人邕州經畧使路公恕奏署試大理評事兼  
貴州刺史參帷幕之任董龜虎之威厓俗敬愛革面受  
事朝廷將以武定南服命安南大校御史中丞趙良金

為邕州復以君無招討判官錄其異能奏加司直昇招討副使無統橫廉貴三州事龍茸之下直道有立獷悍之內義威必行賦增而不擾法一而無憾卒於官

崔方實元和十年容州兵馬使破蠻賊黃探平其黨與獻俘以聞憲宗嘉之

柳宗元字子厚河東人元和十年柳州刺史柳人以男  
女質錢過期不贖子本均則沒為奴婢宗元設方計悉  
贖之尤貧者令書傭視直足相當還其質已沒者具已



錢助贖南方為進士者走數千里從宗元游經指授者為文辭皆有法世號柳柳州十四年卒年四十七既沒柳人懷之託言降柳州之堂人有慢者輒死廟於羅池韓愈因碑以實之云

孔戣字君嚴元和十年嶺南節度使既至免屬州逋負十八萬緡米八萬斛黃金稅歲八百兩先是屬刺史俸率三萬又不時給皆取部中自衣食戣乃倍其俸約不得為貪暴稍以法繩之南方驚口為貨掠人為奴婢戣

峻為之禁親吏得嬰兒於道收育之戮論以死由是閭里相約不敢犯士之斥南不得北歸與有罪之後百餘族才可用用之稟無告者女子為嫁遣之自貞元中黃峒諸蠻叛久不平容桂二管利擄掠幸有功乃請合兵討之戮固言不可帝不聽大發江湖兵會二管人討士被瘴毒死者不可勝計安南乘之殺都護李象古而桂管裴行立容管陽旻皆無功憂死獨戮不邀一旦功交廣晏然大治十五年遷尚書吏部侍郎比歸不載南物

奴婢之籍不增一人

吳武陵元和中桂州防禦判官政尚文雅人謂可興西漢文章

李邵延唐人元和末宦官勢橫劉蕡對策極言其弊竟下第邵曰劉蕡下第我輩登科能無厚顏疏言蕡策漢魏以來無與比臣對不及蕡遠甚乞回所授以旌蕡直不報旋出知賀州有政聲民懷其惠

韓偓字相之性清簡元和初第進士累遷桂管觀察使

部二十餘州自參軍至縣令無慮三百員吏部所補纔十一餘皆觀察使商才補職飲下車悉來謁一吏持籍請補缺員飲下教曰居官治吾不奪其不奉法無望縱舍缺者須按籍取可任任之會春服使至鄉有豪猾厚進賄使者求為縣令使者請飲飲許之既去召鄉豪責以撓法笞其背以令部中自是豪右畏戢時詔置五管監兵盡境賦不足充其費飲處以儉約遂為定制衆以為難卒贈工部侍郎

李渤字濬之寶厯中桂管觀察使桂有灘水出海陽山世言秦命史禄伐粵鑿為漕馬援討徵側復治以通餽後為江水潰毀渠遂廢淺每轉餉役數十戶濟一艘渤醺浚舊道障泄有宜舟楫利焉

徐申字維降京兆人邕管經畧使黃峒蠻納質供賦不敢桀驁踰年進嶺南節度使前後死吏盜印署府職百餘員畏事泄謀作亂申覺殺之誑誤一不問遠俗以攻劫相矜申禁切無復犯外蕃歲以珠玑瑁香文犀浮海

至申於常貢外未嘗賸索商賈饒盈

元晦相國稹從子自吏部郎中授諫議大夫嘗奮發忠  
懇俯伏青蒲至於雪涕出為御史中丞桂管觀察使見  
疊綵山有千越四望左右迴翼心大樂之引水穿治治  
亭院其間小記與題篆皆出其手美秀而文

韋瓘字茂弘年十九入闕應進士舉二十一進士狀頭  
榜下除右拾遺名重縉紳指期直上馬植為長安令二  
十八度候謁不蒙一見大中初任桂管觀察使裁半載

馬植柄政追懷舊事乃以賓客分司罷歸洛因留詩於  
碧潯亭有輪奐未成繩墨在規模已壯閎閎高之句

鄭愚番禺人咸通初桂管觀察使廉察吏弊闔境肅然  
三年嶺南西道節度使蔡京苛慘淫刑為邕州軍士所  
逐詔以愚代之瘡痍嗷嗷方撫循不暇會南詔入寇安  
南都護蔡襲告急勅發荆南湖南兩道兵二千桂管義  
征子弟三千詣邕州受愚節度而嶺南東道奏蠻兵必  
向邕州宜先保護未可馳赴勅愚分兵備禦時所發諸

道兵竟不進襲又奏求益兵愚支捍半載邕州得保無虞朝廷復督責之愚乃自言儒臣無將畧請任武臣於是詔義武節度使康承訓代之承訓上言愚在鎮善禦守狀朝廷始知愚之功召為禮部侍郎

魚孟威咸通中鎮桂州時李勣所浚水道盡廢孟威大為經理且裒羨財標善價僱傭值功成而民不擾

高駢字千里南平郡王崇文孫也累官泰州刺史兼防禦使咸通中帝將復安南拜駢為都護於是容管經畧



使張茵不討賊更以茵兵授駢駢過江約監軍李維周  
繼進維周擁衆壁海門駢次峯州大破南詔蠻收所獲  
贍軍維周忌之匿捷書不奏朝廷不知駢問百餘日詔  
問狀維周劾駢玩敵不進更命右武衛將軍王晏權往  
代駢俄而駢拔安南斬蠻帥段茵遷降附諸洞二萬計  
晏權方挾維周發海門檄駢北歸而駢遣王惠贊傳茵  
遷首京師見艫艫甚盛乃晏權等惠贊懼奪其書匿島  
中間關至京師天子覽書御宣政殿羣臣皆賀大赦天

下進駢檢校刑部尚書仍鎮安南以都護府為靜海軍授駢節度兼諸道行營招討使始築安南城由安南至廣州江漕梗險多巨石駢募工劉治由是舟濟安行儲餉畢給又使者歲至乃鑿道五所置兵護送其徑青石者或傳馬援所不能治既攻之有震碎其石乃得通因名道曰天威云加檢校尚書右僕射

劉謙南漢劉隱之父也為廣州牙將唐乾符五年黃巢攻破廣州去略湖湘間廣州表謙封州刺史賀江鎮遏

使以禦梧桂以西歲餘有兵萬人戰艦百艘

謝肇廣明元年容管經畧使討平叛卒詔答云朕以容南寄重隆恩遂行果能治彼凶妖全活黎庶布威令於一方息蠻氛於千里

蘇仕評柳州亞將開遊奕院於柳大順二年宜之文蘭林環等州賊叛據其城立偽元帥發號令官軍逃匿殆盡仕評聞變發兵從間道出一枝自洛黃東來一枝取道羅城一枝從遷江入賊腹背受敵斬獲無算餘黨盡

皆解去宜州平尋授印領州事因徙柳遊奕院於宜之  
西原仕評既領印綬為刺史愛民如子德威並著境內  
肅然其子日朝聰明俊雅有機智民愛之稱其父為西  
府大王而其子即呼西原太子云仕評故日朝代知州  
事值湖南馬氏叛奉檄入援與其子皆死之

莫休符封州開建人光化間官融州刺史以桂林事迹  
闕然無聞因退居粗錄見聞曰桂林風土記

周元靜為靜江軍節度使見唐末所在兵起約部內守

令將校廣農輯兵俟間圖勤王四境信嚮安州防禦使  
宣晟以計入桂詭奪所領元靜不從與其部將劉士政  
率衆以戰不勝死之部衆咸就死無棄去者

五代吳懷恩番禺人仕南漢光天時官內常侍殤帝劉  
玢驕淫無度懷恩屢切諫不聽中宗晟即位懷恩進開  
府儀同三司乾和中楚王希廣與庶兄爭國中宗以懷  
恩為西北面招討使將兵擊楚拔賀州已而復陷昭州  
未幾帥兵北征盡得蒙桂宜連梧嚴富昭柳象龔十一

州之地當時稱善戰者咸推懷恩為首同時復有吳恂  
恂為將善出奇計乾和時歷官至巨象指揮使既與吳  
懷恩共拔賀州楚人來救恂先鑿大窰於城下覆箔於  
上以土傳之楚將徐知新等逼城恂遣人自穴中發機  
楚人悉陷窰中死者無算知新等遁歸恂侵桂州境上  
掠全州以還

劉博古南漢乾和中潯州刺史有惠政民多愛之嘗植  
橘於陸公井傍潯人稱曰橘井蓋誌其遺澤如此

宋潘美字仲詢大名人開寶三年征嶺南美為桂州道  
行營都部署尹崇珂為副師次白霞南漢賀州刺史劉  
守忠告急於漢主劉鋹鋹遣龔澄樞守賀州郭崇岳往  
桂州李托往昭州守禦美前鋒至芳林澄樞遁還美遂  
圍賀州鋹遣伍彥柔將兵援賀美聞彥柔至潛以奇兵  
伏南鄉岸彥柔夜泊南鄉艤舟岸側遲明挾彈登岸方  
踞牀指揮伏兵猝起南漢軍大亂死者千人擒彥柔斬  
之梟其首示城中翌日賀州陷美等督戰艦聲言順流

趣廣州銀以潘崇徹為都統將兵五萬屯賀江美等次  
昭州破開建砦擒砦將靳暉崇徹但擁衆自保昭州刺  
史田行稠遁去城遂陷桂州刺史李承進亦棄城走廣  
右咸附進師克廣州銀降送京師即命美與崇珂同知  
廣州兼嶺南道轉運使未幾南漢開府樂範容州都指  
揮鄧存忠等叛崇珂盡平其黨初賀州未下荆湖轉運  
使王明督所部護送輜重及丁夫數千堙塹抵城城中  
懼遂降時都監王繼勳在美軍中驍勇絕倫故所向輒



勝

樂繼能全州刺史權知桂州從潘美下昭桂二州有功  
王明字如晦成安人開寶三年大舉南征以明為隨軍  
轉運使山路險絕以丁壯數萬人轉遞供億不缺每下  
一郡一城必先保其簿書守其倉庫既而賀州未下明  
與主帥計曰當急取之恐援兵至我師勝負未可知諸  
將頗猶豫明乃擐甲胄率所部護送輜重卒百人擁丁  
夫數千畚鍤皆作堙其塹直抵城門城中懼開門納款

遂據有之廣州平以明為轉運撫使明遍歷部內視民疾苦舊無名科斂悉條奏除之嶺表遂安

許仲宣字希粲青州人開寶中廣西轉運使會征交州值炎瘴士卒死者十二三大將孫全興等失律仲宣因奏罷其兵不待報即以兵分屯諸州開庫賞賜草檄書諭交州交州送款內附遣使修貢仲宣復上疏待罪太宗嘉之初仲宣之遣兵也人或難之仲宣曰若待報將積屍橫野矣誅一族活萬夫吾何恨哉

王嗣宗字希阮汾州人開寶八年親試狀元太宗時知橫州時遣武德卒潛察遠方事嗣宗械送京師因奏曰陛下不委任賢俊而猥信此輩以為耳目臣竊不取太宗怒械嗣宗下吏削職會赦復官累官至樞密副使蒙延永長沙人五代末知賓州宋初以捍賊死節子少連補左班殿直以邕州功加殿前承旨出使於賓因居焉其孫傳及裔孫鑄皆登進士人以為忠義之報

楊居政開寶中知賓州始創治廨築城以衛居民前守

蒙延永為賊所害居政撫其二子買田宅以贍之

范旻字貴參丞相質之子嶺南初平旻知邕州邕俗好淫祀輕醫藥旻下令禁止又市藥以施之活者以千計為撰邕管雜記三卷併刻療病方書寘諸廳壁民咸化之

邊珣字待價華州鄭人太宗即位充廣南西路轉運使初至桂州會張頌卒藁葬城外僕人分匿其家財珣至悉追取之部送其柩歸維州又屬郡守與護軍有忿隙

者但奏令易地不致之罪釁太平興國五年代歸拜右  
諫議大夫

魏廷式字君憲大名人太平興國五年中第歷著作佐  
郎轉吏部員外郎知桂州所至以嚴明稱

侯仁寶太宗時以蔭遷太子中允趙普壻也盧多遜與  
普有隙普罷相即以仁寶知邕州州之右江生毒藥樹  
宣化人嘗採貨之仁寶以聞詔盡伐去九年不代太平  
興國中上言陳取交州之策太宗大喜令召歸多遜遽

奏曰若召仁寶其謀必泄不如授以飛輓之任且經度之別遣偏將發荊湖兵長驅而往勢必萬全遂以仁寶為交州水陸計度轉運使遇賊為所害死江中贈工部侍郎錄其二子

柳開字仲塗大名人開寶六年進士端拱元年知全州全西洞有粟氏者聚族五百餘口率常殺掠民擄民婦女以至戶無積糗野無耕井皆為粟氏攘奪朝廷遣使臣置峽口香烟羊狀等七寨禦之不能制其為患公至

乃出府庫帛製衣造銀帶暨巾帽數百副選衙吏之勇  
辦可使者得三人俾入溪洞諭粟氏曰天子擇我來此  
爾輩倚山恃險而害我民爾出當與爾賞與爾屋為爾  
居與爾田為爾業不然將益兵深入盡滅爾類矣粟氏  
懼留衙吏二人為質其一與粟氏酋長五人俱出公賜  
以衣帽銀帶緡錢親犒勞撫慰謂吏民曰粟氏自此不  
為爾患可犒之吏民爭以鼓樂飲粟氏居數日公命粟  
氏乘馬還洞口約日并族而出至日酋長先率數十人

來歸不月攜老幼盡數百口俱至公賞犒如一遂營室而使盡居焉作時鑑一篇刻石以誡之酋首詣京師太宗命五酋首皆為全之上佐官至今被命服有俸給而完其族也太宗以公為能賜錢三十萬開嘗於郡北得泉石之勝築堂山椒率士人講讀其間邦人名曰柳山以志愛云淳化元年移知桂州明年詔歸

姚坦淳化初知潯州卓有異政盜息民安公餘遊思陵山得高僧倡和常處一石巖下後人名之曰姚翁巖



恭輔咸平中判龔州政尚愷弟民孚政肅綽有古風  
胡則永康人果敢有才真宗時以進士為廣西轉運使  
按宜州重辟九十九人為辨活者九人

郎簡字叔廉臨安人真宗時知藤州興學養士一變其  
俗歷官尚書致仕

宋師高咸平初羅蠻率衆內寇據土堡寨易其額曰貢  
州師高領兵戡定不踰月而俘馘無遺類上其功辟知  
宜山令次陞宜倅後陞知州四境安堵

陳堯叟字唐夫閬中人咸平初廣南西路轉運使嶺南風俗病者禱神不服藥堯叟乃集驗方刻石桂州驛又以地氣蒸暑為植樹鑿井每三二十里置亭舍具飲器人免暍死時有詔諸路課民種桑棗堯叟上言臣所部諸州田多山石地少桑蠶因勸諭部民廣植麻苧欲望自今許以所種麻苧頃畝折桑棗之數諸縣令課民以布赴官賣者免其算稅如此則布帛上供泉貨下流公私交濟其利甚博詔從之

陳執中南昌人咸平中知梧州陶民豈弟喜佳山水公餘登眺已而上復古要道三篇真宗異而召之

張從吉臨朐人咸平中知宜州屢破溪蠻轉運使陳堯叟上其狀累遷內殿崇班閣門祇候

魏瓘字用之提點廣南西路刑獄邕州獠戶緣逋負沒婦女為傭者一千餘人悉奏還其家就除轉運使劉鋹時計口以稅雖舟居皆不免至是猶有未除者瓘為除之減柳州無名役四百人

曹克明字堯卿百丈人景德中知邕州左右江蠻峒三十六克明召其酋長諭以恩信是歲承天節相率來集克明慰拊出衣服遺之感泣而去獨如洪峒恃險不至克明諭兩江防遏使黃衆盈引兵攻之斬其首領陸木前梟于市宜州澄海軍校陳進反時鬱江暴漲州城摧圯克明率丁夫伐木為連舫維之水上狀如郭郭又多旗幟浮巨筏陳兵其上為守禦備募溪峒兵三千而黃衆盈亦濟兵千五百將趣象州會安撫使曹利用約克

明會兵行次貴州遇賊大敗之斬首四百餘級徙宜融  
桂昭柳象邕欽廉白十州都巡檢使兼安撫使既至蠻  
酋獻藥一器曰谿峒藥藥箭中人以是解之可不死克  
明曰何以驗之曰請試以雞犬克明曰當試以人乃取  
藥箭刺酋股而飲以藥即死羣蠻慙懼而去徙知桂州  
兼管勾谿峒公事始置谿峒司又奏閱廣南兩路土軍  
為忠敢軍州人覆茅為屋多火災克明選北軍教以陶  
瓦又激江水入城以防火災交趾李公蘊寇邕州以文

思使復知邕州遣人諭以利害公蘊拜表謝罪

曹利用字用之寧晉人祥符中劉永規知宜州馭下殘酷軍校乘衆怨殺永規叛陷柳城縣圍象州分兵掠廣州嶺南騷動帝以遠方守將非其人以起邊釁利用曉方畧盡心于事以為廣南安撫使利用至武宣縣賊持健鏢蒙采盾衣甲堅利鋒鏑不能入利用使士持巨斧長刀破盾遂斬其首以殉嶺南平

余傳字亞夫莆田人天禧二年知北流縣興學校建橋

梁士民德之

孫抗字和叔天聖間知潯州潯當是時人未趨學乃改作廟學召吏民子弟之秀者親為據案講說誘勸以文藝居未幾旁州士皆來學學者由此遂多後除廣西轉運使儂智高反天子出大臣部諸將兵數萬擊之君驅散亡殘敗之吏轉芻米於惶擾卒急之間又以餘力督守吏治城塹修器械屬州多完而師飽以有功

蘇紳字儀甫晉江人安化蠻蒙光月率衆寇宜州敗官

軍殺鈴轄張懷志等六人紳上言臣頃從事宜州粗知  
本末其勢可以緩圖不可以速取可以計覆不可以力  
爭請命轉運使備數年軍食為持久計伺得便利即圖  
深入不越一年必就殄滅朝廷用其策遣馮仲已守桂  
州經制之蠻遂平

馮仲已字齊賢河陽人天聖中知邕州治舍有井相傳  
不敢飲飲輒死仲已日汲自供終無恙旁城數里有金  
花木土俗言花開即瘴起人不敢近仲已故以花盛時



酣燕其下亦復無害改知桂州兼廣西鈐轄會安化蠻  
犯邊仁宗遣仲已討之仲已疾馳至宜州由三路以進  
臨軍單騎出陣語酋豪曰朝廷撫汝甚厚汝乃自取滅  
亡耶今汝聽吾言則生不則無噍類矣衆泣羅拜明日  
率衆降軍門以勞遷西上閣門使知宜州樂善蠻寇武  
陽仲已遣諭禍福蠻大悅悉還所掠又莫世堪負險抄  
劫為患仲已設法擒捕置于法

梁適字仲賢東平人知梧州五嶺自南漢時民間折稅

已重轉運使以調不足復折之適為奏免民甚便之

呂壽景祐初通判宜州會儂智高將入寇壽區處防禦  
民賴以寧

梅摯景祐間知昭州文章政事卓然有聲時官廣南者  
多憚嵐瘴不願往摯作五瘴說鐫於石以儆有位

杜杞字偉長無錫人寶元間知橫州仁宗時安化蠻寇  
邊杞言嶺南諸郡無城郭甲兵之備牧守非才橫為邕  
欽廉三郡咽喉地勢險阻可屯兵為援邕管内制廣源

外控交趾願擇文臣識權變練達嶺外事者以為牧守  
使經制邊事從之慶厯中為廣西安撫使時區希範誘  
白崖山酋叛杞至宜州攻破白崖等寨擒希範醢之以  
賜諸蠻峒

陶弼字商翁永州人慶厯中陽朔主簿時儂智高犯南  
海楊畋為安撫使辟參軍謀使下英江會諸將議擊未  
至智高解去弼舍舟從其徒數十人間關步出赴畋次  
臨賀大將蔣偕張忠戰死餘衆畏亡將被誅多降賊弼

數與之遇亟矯旄命揭榜道上諭使歸許以不死凡得  
千五百人調陽朔令課民植木官道旁夾數百里自是  
行者無夏秋暑暍之苦他郡縣悉效之攝興安令移書  
說桂守蕭固浚靈渠以通漕不聽至李師中卒浚之師  
征安南餽餉於是乎出大為民利知邕州邕經儂寇井  
遂蕩然人不樂其生弼綏輯惠養至忘其勤諸峒獻土  
物求內附弼降意撫答謝其贄皆感悅無犯邊者邕地  
卑下水易集夏大雨彌月弼登城以望三邊皆漫為陂

澤亟室垠江三門諭兵民即高避害俄而水大至弼身  
先版鋪名僚吏賦役為土囊千餘置道上水果從竇入  
隨塞之城雖不壞而人皆乏食則為發廩以賑於內方  
舟以饁於外水不及女牆者三板旬有五日乃退公私  
一無所失亡自橫潯以東數州皆沒弼久於邕請便郡  
徙邕州郭達南征轉弼康州團練使復知邕州民再罹  
禍亂散匿山谷弼率百騎深入左江峒民知其至扶老  
攜幼以歸達帥官軍臨富良江使弼殿交人納款達欲

班師恐為所襲乃以計夜起軍不整騎步相蹈藉亂行賊隔江陰伺覘知弼殿不敢追申令帳下毋動遲明結隊徐行達賴以善還建所得廣源峒為順州枕柳為縣進弼西上閣門使留知順州州去邕二千里多毒草瘴霧戍卒死者什七八弼亦疾甚然蚤暮勞軍視其良苦意氣激揚士莫不感泣彊奮起為用交人襲取枕柳揚聲欲圖州獨難弼素得人心賊動息皆先知獲間諜不殺諭以逆順縱之去恩威兩施以是終弼在不敢犯加

東上閤門使未拜而卒詔錄其家五人弼能為詩好士  
樂施所得俸祿悉以與人家至貧不恤也既死妻在鄉  
里僦屋以居

趙抃蘭溪人慶厯中宜州別駕溫恭豈弟愛民如子民  
有罹於法者曲為體恤務使犯者與我皆無怨而後已  
有一卒殺人當死方繫獄病疽未潰公使醫療得不死  
會赦以免尤加意士類暇則聚集諸生會於香山梵寺  
講明身心性命之學士習為之不變一出入琴鶴自

隨嘗語人曰吾豈玩物哉鶴之色潔而純琴之聲清以越吾將以調和有衆而馴服蠻邦也鶴斃瘞於龍塘之原民思公即其地建瘞鶴亭今亭廢其址猶存

徐的字公準建安人廣南西路提點刑獄慶厯中安化州蠻攻殺將吏所部卒畏誅謀欲叛的馳至宜州慰曉之曰爾曹亡懼能出力討賊猶可立功自贖若朝叛則夕死非計也衆皆斂手聽命奏復澄海忠敢軍後皆獲其用



盧革字仲辛德清人慶厯中知龔州蠻入寇桂管騷動  
革經畫軍須先事而集移書安撫使杜杞請治諸郡城  
及易長吏之不才者又言嶺外小郡合四五不當中州  
一大縣無城池甲兵之備宜度遠近并省之後儂智高  
來九郡相繼不守皆如革慮

蕭固字幹臣新喻人以進士累官屯田員外郎慶厯間  
區希範誅廣西困於兵詔以君治桂州兼廣西都巡檢  
提舉兵甲溪峒事至則因其故俗治以寬大廣西遂安

而君以材選為荆湖南路提點刑獄未幾以君之信於南方也又以君為廣西水陸計度轉運使方是時儂智高蒐兵誘聚中國亡命陰以其衆窺邊境而邊吏士尚皆不寤君獨憂此以謂必為南方之患乃選遣才辨吏說智高內屬上書言狀請因以一官撫之使抗交趾且可以紓患書下樞密樞密以智高故屬交趾納之生事以詔問君能保交趾不爭智高終無為寇則具以聞君曰蠻貊視利則動必保其往非臣之所能顧今中國勢

未可以有事於蠻貊則如智高者撫之而已且智高才武強力非交趾所能爭而畜也就其能爭則蠻貊方自相攻吾乃所以間而無事爭議至五六而樞密逆紕君言不報君又奏請擇將吏繕兵械修城郭以待變亦至五六又皆不報而君以名歸智高果反邕州殺其守將出入廣東西十有一州所至殘破吏士多走死樞密乃更歸責於君以知吉州一時士大夫紛紛欲為君訟君遂絕口無所道世以此稱君長者又因知君智謀果可

以任邊事居頃之遂復以為廣東轉運使又以直昭文館知桂州當是時儂宗旦聚兵智高故地無所屬邕州為之警諸將皆議興師君又獨持招降之議朝廷用君議宗旦遂釋兵服以為西頭供奉官而邊無事於是君積官至尚書刑部郎中以集賢殿修撰再任會蠻中紹泰反巡檢宋士堯戰死仁宗使中貴人出視君坐士堯死降知江州

粵西文載卷六十二